

將忠

兵者凶器將者危任是以氣剛則缺任重則危故善將者不恃強不怙勢寵之不喜辱之不懼見利不貪見色不淫以身徇國一意而已

將善

夫將有五善四欲五善者謂善知敵之形勢善知進退之道善知國之虛實善知天時人事善知山川坦險四欲者議欲奇保欲密眾欲靜心欲一

將剛

善將者至剛不可折至柔不可卷故以弱制強以柔制剛純柔純弱其勢必削純剛純強其勢必亡不柔不剛合道之常

將驕

將不可驕將驕則失禮失禮則人離人離則眾叛將不可恇恇則賞信不行賞信不行則士不致命士不致命則軍無功軍無功則國虛國虛則寇實孔子曰如有周公之才之美使驕且吝其餘不足觀也已

將彊

將有五彊八惡高節可以勵俗孝弟可以揚名信義可以交友汎愛可以容眾力行可以建功此將之五彊也謀不能料是非理不能任賢良亂不能正刑法富不能濟貧乏智不能備未形

道藏輯要

忠武侯集
心書

美

星集三